

■ COLUMNA

Co reagir sin trumpadas?

MARIA CADRUVI

Trump ha trumpà ed è vegnì trumpà. Quai tuna sco sche ses num fiss program – almain per rumantsch. Ma trumpadas tutgan tar la vita da tuts. Nus trumpain e nus vegnin trumpads – adina puspè. Che nus trumpain auters na faschain nus savens gnanca persenn. Che nus sezs essan vegnids trumpads ans regurdain nus magari anc onns ed onns pli tard. I morda e fa che nus vegnin tugns e marmugns. Perquai vali la paina d'ans dumandar: Co reagir sin trumpadas? La proxima è forsa già programmada.

Quai cun las trumpadas cumenza già baud. Quantas larmas da crocodil èn già vegnidas sponsas perquai ch'ella ha sdrappà or da maun ad el in termagl, ed el è stà trumpà perquai ch'el era da l'idea che quai saja ses termagl. Mattatschs pitschens bragian dal reminent para pli savens che mattatschas pitschnas. Jau na sai betg sche quai constat – e quai fiss era in auter tema. Ma interessant èsi en mintga cas. Tge capita en mes svilup persunal, sche jau fatsch l'experientscha già da pitschen che jau hai dapli atenziun e sai far dapli effect suenter ina trumpada, sche jau bragel e fatsch canera?



Trump ha fatg blera canera suenter ch'el ha pers las davosas elecziuns. El ha tratg tut ils registers d'in trumpà. Cumenzà ha el cun refusar d'acceptar la sconfitta, cun snegar la realitad e cun dir manzognas. El ha vulì irritar e divider. Ed el ha cuntinuà cun intrigar, inculpar e la finala cun instigar.

Tgi che gughegia e va ten il cumbat, ristga da perder e da vegnir trumpà. Quai è la vita – ed en il sport per exempel il paun da mintgadi. Ch'ins emprenda là da perder è franc in dals gronds merits dal sport da cumpetiziun. Las ditgas ed istorgias raquintan era adina puspè da concurrenz e cumbats, da rivalitads e scuidanzas, da vendetgas e guerras. Quai ans interessescha. I marscha insatge. N'ha betg era la guerra da Troja cumenzà pervi da trumpadas e per-

maladas? E Kain ed Abel? E la regina en la paraula da l'Alvetta?

Material illustrativ e didactic avessan nus pia avunda. Sper ravgia e gritta, rampign e malizia, far il chau botsch e renviar da tschantschar, sa preschentar sco unfrenda, protestar e chastiar, datti sa chapescha anc autras pusaisvladads. Ins dastga conceder ed era exprimer: «Ti m'has trumpà.» Ma suenter èsi impurtant da relativar, guardar dad in auter punct da vista, esser indulgent e mantegnair il respect e l'umor. E sche nus savain schizunt perdunar che nosa maiestad è vegnida trumpada e perfin embliadar, lura essan nus già in pulit pass enavant.

Il mender è però sch'ins è trumpà da sasez, na vegn betg da perdunar a sasez e resta en questa spirala destructiva. Lura na gida forsa gnanc quai che Papa Gion XXIII scheva para mintgatant a sasez: «Giovanni, na ta prenda betg per uschè impurtant.» In cussegl ch'avess fatg bain era a Trump.

Maria Cadruvi, schurnalista pensiunada, stat a Ruschein e maina ina «impulseria». Mintgatant accompagna ella gruppas pitschnas en la lavur dad autobiografia, mintgatant zambregia ella vi d'in text. E mintgatant na fa ella nagut.